

求恕齋
叢書

雪橋詩話三集

六





雪橋詩話三集卷第六

遼陽楊鍾義撰集

吳興劉承幹參校

白健齋中丞準泰先世高麗人賜姓他喇氏隸內府正
黃旗由筆帖式主事累官福州將軍乾隆元年改官巡
道以疾辭 高宗怒籍其家無長物得簿公私出入如
列眉 上以爲廉授長蘆鹽政調兩淮九年巡撫安徽
歷廣東山西山東巡撫辛未南巡或勸拘虎豹備彈弦
跼躄爲供奉者公大驚曰 皇上爲觀河省稼巡狩璽
書如日爲大臣者目未憤其可違詔以非道悅耶除方

物外無所貢十七年以合河僞疏事致於理發香山監
工病卒年七十二少子某舉孝廉後爲僧號瑩據上人
朱二亭嘗贈以詩云夢回鐘靜萬緣離欲作人天大導
師開府中丞貴公子打包南國苦闍黎松風吹雨收經
處山月流泉得偈時我亦擬求精進法憑君慧劍斷嗔
癡

雍正丁未武進莊南村兵備柱廷對進呈第一後易置
二甲第二張文和嘗語人曰莊某宜元而不元稍抑於
前必償於後至乾隆乙丑方耕宗伯從二甲擢一甲第
二甲戌仲漳講學以二甲第一特置一甲第一丙子方

耕典試浙江仲漳主福建試皆道出常州試竣共給假
奉觴二親錢文端贈句云殿上卿雲傳兩見膝前天使
喜同歸一時稱爲盛事仲漳婦翁爲彭芝庭尙書丁未
會狀亦佳話也其上德濟齋少宰云夙德冠崇班巖巖
峻斗山忠勤唐特進禮樂漢河閒景緯同標望蒼生願
識顏虛懷仍善下詣絕莫躋攀列土榮非願名山道與
俱精心窮橐籥元理洩苞符黼座煩紆眷蓬廬尙久須
從來稱大雅今日覩眞儒衡岳凌無極東溟一氣中幾
年膺玉節到處扇春風每念江淮地彌霑覆露功袞衣
南國頌豈弟孰如公帝命佐邦衡南曹領搢紳均平隨

器量清覽絕風塵槐市陳經篋蓬山引席珍春風盈講
座誰不荷陶甄觀海朝宗切登門夙志欽願陪鱸座側
卻望桂巖深朗若雲霞氣清知松柏心陳詞歌壽豈珍
重愧南金

翁正三乙巳三月廿九日奏事清漪園詩別館新晴曙
剛逢奏雨來廊深湖水繞逕轉甕山開日泛金霞影天
浮碧玉堆

小金山

侍臣賜食罷卅載記蓬萊清漪園在萬

壽山先臣侍郎公嘗奉派管理園務高宗以萬壽山
背山臨水因名其堂曰樂壽堂米萬鍾欲致房山大石
於勺園僅達良鄉而止乾隆辛未命移置樂壽堂名之

曰青芝岫而係以詩近西軒夕佳樓皆向西山金陵觀
音山永濟寺懸閣臨江飛廊緣壁因於萬壽山仿作香
巖室取滕王閣序句意作六兼齋每至清漪園先坐玉
瀾堂傳餐理事肖西湖蕉石鳴琴景爲睇佳榭蘇門山
有邵雍安樂窩遺蹟肖其制爲邵窩餘如停靄樓無盡
意軒袖嵐書屋宜雲館合新亭對鷗舫澄鮮堂圓朗齋
澹寧堂清可軒清遙亭味閒齋知春亭構虛軒霽清軒
養雲軒雲繪軒藕香榭繪芳堂尋雲亭雲松巢道名齋
曠觀齋景明樓水周堂治鏡閣寄瀾亭懷新書屋各有
題詠其怡春堂則每鐙節後奉慈寧憑御處也惠山秦

園最古辛未南巡歸肖其意於萬壽山東麓名曰惠山

園有載時堂墨妙軒

內府三希堂帖於壬申年鐫成甲戌又刻墨妙軒帖於此

就雲

樓澹碧齋水樂亭知魚橋尋詩逕涵光洞八景若暢春

園則在圓明園之南 聖祖所建正殿名九經三事

翁正三兩直西苑同韻亭賦豐澤深千耦瀛壺繞十洲

玉虹隄外兩珠露鏡中秋又玉蘭軒奏事詩極疊合秋

陰仙壺貯碧岑地迴瑤海北天在玉蘭心皆嘉慶初年

作也西苑在西華門之西創自前明今瀛臺上之涵元

殿諸處皆仍其舊至迤北之豐澤園惇敘殿乃康熙間

所建迤南之淑清院寶月樓同豫軒一帶則乾隆間所

增白塔山卽金時之瓊華巖順治間以建白塔而名其
下爲太液池又稱爲瀛臺三海引西山玉泉水從德勝
門水關達地安門之後湖從步梁橋潛流入苑匯爲巨
池中海東西岸跨長橋修數百步樹坊楔二東曰玉蝀
西曰金鼇橋以南爲中海南海橋以北爲北海中海北
面北海南面綠垣皆屬於橋俗所謂西湖者開濬深廣
名之曰昆明湖設閘啟閉以溉稻畦以耕織圖摹成石
刻置於延賞齋是處前後爲織染局西爲蠶戶房環植
以桑西隔玉河皆爲稻田康熙閒幸西苑泛舟詞臣侍
宴分賜魚藕乾隆閒有流杯亭聯句中如漪蘭堂同豫

軒蘭室諸處爲歲時佛宇升香簡閱水技臨駐之所其
寺院則萬善時應標於南永安闡福大西天極樂世界
諸寺標於北春耦齋在瀛臺之西一路皆田塍惇敘殿
在豐澤園門內殿後爲澄懷堂乾隆閒駕詣瀛臺召對
莅事每在於此承光殿面臨太液池東有堂曰古籟最
高處爲悅心殿乾隆己亥得馮銓快雪堂石刻補摹泐
石築快雪堂砌石其中浴蘭軒在液池上俗謂之北海
浴蘭義取九歌復初齋集作玉蘭軒誤豐樂軒在紫碧
山房東南隅爲 世宗所構閱古樓在瓊嶼西麓嵌三
希堂法帖石刻於壁閒紫光閣本明之平臺乾隆二十

五年平定伊犁回部圖功臣像其中並弄藏得勝靈纛
軍器自是每歲朝正移藩部讌集於此閣之後爲武成
殿左右壁刻御筆西師詩開惑論左右廡刻乙亥記己
卯成功詩二百二十餘首 高宗聖製春耦齋記曰語
云周過其厯秦不及期班固美其親親賢賢固本眾建
至鄙秦以子弟爲匹夫骨肉失藩衛其然豈其然哉夫
秦之失賈誼論之詳矣關封建之議則莫過於柳宗元
而周之所以過其厯後世鮮有發厥旨者蓋自后稷公
劉世以重農爲務惟土物愛知稼穡艱至於文武成康
猶是道也立我蒸民祈天永命詩書所歎略同一軌國

家龍興東海較之周家藝荏菽迺場疆者固有不同而天下初定禮樂未遑卽舉祈穀之祭下力田之詔我皇祖建此豐澤園於西苑以勸樹藝而較晴雨至於皇考歲舉耕耘之典必先演耕於園北弄田以視周家世業肯穫者有過無弗及予小子聰聽祖考之彝訓亦惟是無逸作所民本食天之念拳拳母懈不敢以一己之貴而忽萬姓之窮不敢以四方之豐而忘一隅之歉二十一年以來此物此志也園之內有齋茲以春耦名之而闡其說如右石渠寶笈中舊藏唐韓滉五牛圖農部尙書蔣溥因進其父故大學士蔣廷錫做項聖謨摹

本又得項聖謨卷古今名蹟一日會合良稱藝苑盛事
夫服疇力穡牛之資用最鉅並貯齋中每一展觀如見
洪縻縹輓馴擾膏壤閒然予知依務本之意所爲在此
不在彼也至勤政殿居西苑正中額爲 聖祖奎畫
世宗於圓明園視事之殿亦以勤政名之 高宗於香
山靜宜園復建勤政殿 列聖相承莫不以是爲亟
仁宗曾著勤政殿記勤政箴揭示焉補桐書屋綺思樓
皆雍正初年 高宗讀書處曰日知閣在石梁上日課
詩論於此樂善堂集而外別爲日知齋說四卷見乾隆
戊申日知閣詩注

黃莘山恭頌惠獻貝子功績詩并呈制府鎮國將軍云
秉鉞登壇世統兵折衝樽俎舊威聲鎬鐘豐鼎藏金冊
旅矢彤弓出玉京饒吹連山摧伏莽樓船橫海戮長鯨
宗臣名將垂勳少半壁東南萬里城三藁方苞起蝟毛
中原慘黷沸波濤專征元帥歸龍種制閩將軍握豹韜
下瀨眞成迎刃勢丸泥空詡守關勞降王已入游魚鼎
笑語迎門餉濁醪鞠躬盡瘁鬢如絲蹇蹇王臣逐尾箕
新息瘴生茆嶺日臥龍星隕丈原時勤民定國馨香重
丹荔黃蕉陟降思不獨闕宮瞻奔奔道山亭比峴山碑
天潢貽燕溯淵源嶺海重瞻棨戟門周召勳庸絲帶礪

閒平禮樂奠屏藩治臻累洽重熙日人受三朝再世恩
歲歲祠堂春草綠杖藜騎竹擁王孫時乾隆初元德濟
齋方督閩浙也

吳縣韓其武明經補瓢存稿爲歸愚宗伯手訂詩詞古
文皆蘊藉醇雅爲有德之言經項宮詹廢園云林巒莽
榛蕪陂池沒新漲巍巍宮詹園行人過惆悵勝國隆儒
臣金貝從物望冠以東朝銜居然號儲相布置依前模
粉藻愜心匠難窮歌舞娛罔測花鳥狀不幸罹世厄失
足誤所向國破家何依身名兩凋喪想當誦讀時亦能
籌伯王事至不復持空言安足仗公卿羅第宅誰能久

無恙功名與氣節卓爲世景仰賢愚同百年不朽亦相
沉流連景物餘藉爾作懲創欲保明哲身反遜匹夫諒
許琰故寒儒詎識游觀壯其曾祖治明黃巖令祖馨明
諸生崇禎初定逆案吳人毀逆祠卽其地爲五人墓馨
時年未弱冠以書名吳因之致書乞題碣大書五人之
墓四字書曰人子之也所以媿屈膝闡寺之不爲人者
其武詩云英風颯颯繞迴塘青塚纍纍俠骨香一擊自
同椎博浪百身何異痛三良頭顱敢爲忠臣惜販負能
增黨籍光變例春秋墓前石先人特筆凜風霜王西莊
日下集懷其武詩滌骨餒肌格儘奇都官水部轉多師

比來蹤跡成蕭散
嬾作虛鞞桃杖詩
蓋甚推之其題趙
承旨畫云雕鞍初
脫臥平沙想爲天
閑貌玉花太息朔
風吹白雁舊時龍
種屬誰家花花葉
葉意交融露側風
敲自化工誰道遺
民作心史也將餘
墨寫幽叢語亦含
蓄

補瓢明經先世居
長洲之雲和里號
雲東韓氏內行醅
備從父弟子敬疾
篤執補瓢手指其
婦腹曰儻生男必
教以讀書母廢我
業死踰月果生男
暢生四歲母又歿
攜暢來家以養以
教十有三年作文
頗有進口占示之
曰母胎悲失父四
歲母云亡兩匱棲
磧屋孤雛寄我傍

莫嫌勤督責且復戀詞章轉眼須成立悠悠此意長其
歲暮雜書示子姪之一云先民亦有言學以治生急此
言非教貪庶用資自立菽水飢可充蓬華陋且葺翛然
淡無營禮教猶所習并此而不足其能免憂悒挺而或
走險狡獪誠難戢傾貲鬪衣履物力焉能給樸野何足
慙節縮在籽粒酒食相徵逐殆哉尤岌岌勤惰關盛衰
人禽判呼吸慎勿厭曉曉不異秦庭泣彭芝庭尙書稱
其父聲谷先生勤毖治家濡染庭訓處豐而約門以內
雍然穆然有所自也其云譬如經冬草植根土宜厚惟
悴冰霜餘春來特娟秀人生一失足百歲那可復尤足

爲潔身植品之法

嘉興曹孺巖孝廉培亨有松風堂集工於集句集陶如
不學狂馳子聊爲隴畝民揮觴道平素緩帶盡歡娛妙
造自然集杜尤多遣興二首云經濟慚長策哀歌歎短
衣雲晴鷗更舞月細鵲休飛竟答兒童問其如儔侶稀
灌園長取適永息漢陰機幽棲誠簡略客至罷琴書南
極青山眾西郊白露初宿陰繁素柰別浦落紅葉對酒
都疑夢因歌野興疏張瓜田稱其妙集良材巧裁狐腋
與萬循初爲潘楊之戚自作者多輕率不逮集句爲可
傳

鴻臚寺大門內舊設龍亭緬甸琉球安南朝鮮接踵朝
貢演禮於此袖煙堂丁香植於陳實齋宗伯花時觴詠
唐薊門司寇夾植桃李作記陷於廳事南偏而汪退谷
爲之書儲梅夫詩設官綿蕞因重譯瓦壁森嚴舊有亭
歲歲外藩看習禮砌花榮落似堯萁鴻臚所掌引相朝
儀與漢謁者臺唐宋閣門宣贊相近也

胡雲持有感侯生詩鶯鶯羣飽鵠鸞飢珠樹無峰寄一
枝憐汝不應文彩減與人何事語言奇林花得意傷春
日酒夢迷天失路時千載有心憐范叔隴雲關雪杳誰
期侯元經臨海明經再舉鴻博帥蘭皋以爲樊紹述劉

復愚後一人中丞某以其書法潦草置之考職得丞簿
黃靜山守鎮江延之閱卷一夕卒官江寧時高才生執
藝就正者填于門于秦礪泉侍郎尤稱神交方其歿也
礪泉春闈中忽夢元經至執手如平生寤則知其已死
遂作四詩哭之礪泉遂以是年魁天下亦異事也諸襄
七題侯主簿攜兒度嶺圖云慈姥磯寒落木稀望夫石
爛擣征衣過橋照見春衫影嶺上晴雲片片飛紛紛擁
萼魯東門詎抵侯生一劍存莫學夢遊輕失足相逢誰
是信陵恩元經題畫詩程魚門於李芋圃齋壁見之歎
諷良久名流罔不傾倒也

吳西林訪黃雪山房紫山徐丈云欲問幽樓郭林芳共
一門隔籬松子墜過澗鶴兒翻養道追虞夏將書潤子
孫坐來成小劫山頂日車昏紫山居清波門外三學士
港門前古井有宋時銀杏一株每當秋風葉落如積雪
焉朱竹垞題詩壁上有白雲當路斷黃雪滿林飄之句
著清波小志與田孝子世容稱南山二高士朱青湖詩
垂老湖灣隱前朝樹表村及沖晦幽居傍水村庭前老
樹已無存則紫山旣歿以後作也

施竹田舊雨齋詩舒雲亭爲之捐俸授梓句如霜力到
竹樹設色愈老蒼林深春意慳老梅抱冷翠均見匠意

邗江土穀祠大樹相傳爲千餘年物同松阜研北賦之
云城西古社神貌崇當門一樹盤蒼穹鸛巢忽墮夕陽
外鴨腳半黃秋影中擁腫詎免野火劫窈窕綴以丹青
工我來摩挲紀甲子移根或者青羊宮自謂不能以唐
宋派別相繩者也

蘇子卿墓在韓城北落村墓前古柏數百本枝皆南向
朱浣桐方伯詩四面青山環北落千株古柏向南朝秦
太子扶蘇墓在綏德州卽北監蒙恬將兵處譚吉璫爲
刻孝子忠臣四大字俞退圃詩怪石插左右陰霾莽迷
離空山歷千年尙有奇鬼馳憶昔蠡賤高鼓弄丞相斯

天潢觸斧鉞忠義皆磷緇哀哉仁孝言父賜安敢辭將
軍雖有辨縛去當誰知窮冬訪遺跡荒墳尙嶽崎落日
照古廟西風捲靈旗大哉碑碣名萬古長嗟咨下馬拜
當道木末聞號鴟

張石帆贈關雪江詩瓦盆有客旋盛酒泥竈無人獨祀
茶乾隆戊午十二月二日雪江七十鮑海門贈詩云唐
積山下客七十未積唐鬱鬱新營柳童童舊井桑生逢
仁壽節門識孝貞坊仲若堪鄰並輸君益老蒼分合傾
山許真如瀉水論名聞俠處士詞屈稗沙門冰雪南山
屐帷簾臘日尊梅花與詩卷羅列當兒孫雪江蓋老而

無子

鄒小山宗伯嘗蒙賜畫禪頤壽扁額有圖記三曰不堪持贈不能應酬不受促迫無錫諸生韓雲卿每代爲設色歸田後闢一齋曰二知每歲除夕畫鍾進士數幅乾隆十一年八月侍宴瀛臺宴罷賜游西苑乘舟至曲水亭聯句是日大學士預擬恭和 御製者三十八人皆卿貳宗伯時以四品銜不在內 高宗親易二人而以公及沈文慤補入亦異數也其三十二牡丹圖趙鹿泉有記

惠定宇序吳竹嶼硯山堂詩云昔人言詩之道有根柢

焉有興會焉鏡中之象水中之月相中之色羚羊挂角
無跡可尋此興會也本之風雅以導其源沂之楚騷漢
魏以達其流博之九經三史諸子以窮其變此根柢也
根柢原於學問興會發於性情云云吾謂論本朝一代
之詩當以此語爲衡學問勝者其詩必有異人之處竹
嶼懷定宇詩經義紛綸并大春天教空谷滯聞身安昌
甲第扶風帳青史流傳祗笑人

保雨村題張棟看雲詩稿云江南江北采芙蓉花落天
寒意已慵惟有看雲人不惡獨留青眼對青松紛紛衣
狗眼中過我亦傷心喚柰何何日與君同載酒西山高

處野雲多看雲從李玉洲授詩法清涼山詩遠樹帶山
排郭入飛雲挾雨過江來劇佳與雨村至契雨村久困
曹掾看雲嘗客康邸兩次獻賦幾得復失遭際略同其
夢雨村詩亦見古道

楊山齋節操凜然初未知其素嫻繪事張看雲有題其
長林豐草圖贈姚晉巖詩甚致推絕看雲故能畫非妄
歎也

桑弼甫有歷城三詩人序一朱令昭次公一劉伍寬蒲
若一方啟英獅山皆沈椒園守山東時所甄錄也獅山
有義行而隱於醫四十始爲詩籍本金華僑棲歷下其

游龍洞詩云神龍挾雷雨變化寧有窮陰沈蟄潭洞吐
氣凌高穹游者跡蘚入螺旋躡崕龍余亦拄藤杖卓險
排幽宮三山陟厯蹇一徑紆迴通窅冥青嶂裏敲側萬
壑松摩挲得古碣緣源與初終威能攝旱魃誥乃來元
豐焉有席勝賞而忘濟世功歸與不覺晏樹灼秋煙紅
風骨頗見高邁

閩縣林青圃通副枝春高士湛孫少孤苦負薪汲甕以
養母官中書時夢母病遂航海歸獲送終能詩尤工書
法丁巳第二人及第以侍講督學河南有三教堂五百
餘所奏請盡改爲義學轉銀臺歸主鼇峰書院教諸生

坐作進止皆有規矩多所成就伊用侯四君詠云納言
妍羣雅才識真良史噩夢感神通思親航萬里繩土常
懸規檢身寧越禮尤工大令書褚薛不爲美

陸清獻宰靈壽時山出一泉民稱陸公泉無錫賈霖沛
然以丙辰進士官靈壽復出一泉民稱賈公泉詩如數
程曉月行忘遠一路青山看到家頗近自然

乾隆壬申李爲棟王瑞霖以賄屬朱荃爲伊子營求入
學伏法杭堇甫哀蜀二友云柴市同歸日難招萬里魂
岷峨半天秀煙霧九秋昏左計人誰惜遺文世或存

聖朝無屈法秋肅卽春溫次首有廿載簪裾接紛吾獨

見欽之句則謂香子編修詞科同年也

嘉善曹古謙鴻詞報罷歸途雜詠云酒盃愁照離人面
草色寒侵去日袍廣陵舟次留別厲太鴻云獻賦漫勞
尋往事挑鐙不盡接深談類皆感遇之詞春雨和錢嶼
沙編修云吟苦縱愁春冷淡病多偏穩睡工夫語極蘊
藉

秦文恭公爲留仙諭德孫未遇時沈酣經籍與管蔡龔
二吳爲五子談經之會舊居在師古河上康熙壬寅其
尊人維生給諫道然以藩邸事罰鍰繫獄文恭誓紓父
難賦詩有栖息知無地晨昏覩有身之句先世遺產爲

之蕩然乃僦居叟巷有斗室卽所謂味經窩也乾隆丙辰成進士第三人授編修給諫罰鍰未完尙在羈所草奏陳情請以身代蒙恩得釋給諫出獄獲優游林下者十餘年時與方恪敏稱二孝贖還故宅曰嘉會堂漢軍王瓚雁亭家奉天乾隆丙辰以拔貢赴京廷試聞母喪痛不欲生抵家母已葬廬墓三載以哀毀卒當結廬墓側時有孤雁巢檐下飲啄與雁亭相隨半載無異或毀其巢雁去雁亭以丸泥補之雁復來明年巢中生艾枝雁復去雁亭知之爲去艾葺草雁來如初三載依依去時猶綣戀哀鳴不能舍己未傳謹堂督學奉天請於朝

表厥宅里爲撰王孝子墓表其言曰禮云喪有疾食肉
飲酒必有草木之滋焉又曰禮爲可傳也爲可繼也故
哭踊有節夫以毀不滅性之義律生其失也過然視夫
居喪無戚戚之容甚且敗度敗禮固生之罪人也雷翠
庭稱爲有關名教之文

善化孫隣初大令良貴博聞強識足跡半天下已未成
進士官常德教授戊辰以計典保薦擢甘之安化令詩
多紀事之作其定西六君子詩一爲任總戎舉一爲拉
都統布敦一爲傅軍門清一爲和將軍起一爲鄂參贊
容安一爲班定北第謂都統死朱墨黑爾之亂其入藏

過保定懷古詩大業未成悲樂毅雄圖已失憾荆軻遂
成讖吳笏菴清鵬題鄂剛烈遺詩卷云更聞班公亦能
詠何人與爲收珠璣定北詩今亦無傳知當時將相大
臣無不兼資文武白山諸選漏略良多其湮沒者不知
凡幾矣定北任楚督時隣初膺荐晉謁訓勵有加初不
以勳門貴仕傲睨微員猶見吾鄉老輩風範其白門紀
游詩謂壬午行虎踞關外一漢軍老人李姓者曰君音
湖廣人記幼年時湖廣四強住此間黃岡杜濬杜界大
冶周蓼卹湘潭黃周星皆畏他倔强此杜界故僦居也
詩有烏金蒼革猶能說十廟牆東杜界家亦可資談助

烏金謂烏珍超
哈今名漢軍旗

乾隆七年怡邸明善堂刻巾箱本四書五經字畫紙墨
極精所造角花素箋精絕可愛曩於海王邨購得百番
今盡失之李越縵用山谷次韻王炳之惠玉版紙韻詩
略云名紙所萃走都市溢塵問價轉華轂魚網厚韌出
東瀛蠶繭鮮明白西蜀承平賢王有素尙獨裁新意斷
冰幅不使纖紋侵行理小整樣花辦角曲寫書實事此
見端驕孫簡彈莫點辱再題怡邸所造角花大牋云玉
璽裁盈尺猶承芳木華盛時想清暇一事必名家白硯
明光雪紅呈押角花摩挲文獻舊莫僅藝林誇又子培

以怡邸凸花小箋索書云桃花細鑿玉蠶紙薑牙斜錯
銀鉤書文房持此慰饑渴十賚可比一斛珠押角豔奪
紅珊瑚澄心祕造恐不如我吟小詩出新意濯之錦川
花滿湖皆可增成故實也驕孫謂載垣

慈航寺距保定廿五里地名漕河向只一團焦有鑑慈
長者者主之方恪敏未遇時嘗大雪夜過此凍踣於菴
門外鑑慈聞人聲拔棊視之掖之入飲以湯水得不死
待其愈復資以衣裝趣之入都不二十年恪敏擁節全
畿遂出私財建寺以報其德鑑慈頗有道不以公加禮
而入州府公之子勤襄公猶子來青尙書亦先後督直

遂爲冠蓋憩集之所香火殊盛壁有恪敏自書詩幅及
貯蘭圖遺照吳蠡濤有寺門斜照逐沙偏宮保祠堂側
左邊及柳眠官道王睢老麥熟齋廚不飪便之句吳巢
松詩云英雄有迤邐巨眼得尊宿請看鑑慈師意在拯
焚獨譬如昏夜叩必與水火足誰知雪中人乃爲八州
督種木本無意棟梁已儲蓄匪特霖雨宏兼資龍象福
報恩崇煥儼鐘磬出花竹隴呼十牛耕廚給百僧粥積
然一團焦氣壓萬間屋有德師不居悟此可不辱恪敏
自塞外歸金陵家無一椽借居清涼山僧舍中州僧知
爲非常人厚待之其修清涼山廟亦所以報也

毘陵莊念農太守經畚丁巳進士乾隆十年貴池民熊
永安與金海鬥金傷重熊慮訟不勝適族弟長德病死
乃斧尸頭誣金縣令謝廉其姦遂并誣謝謝竟落職而
金抵罪民洶洶不平念農時知建德撫軍諾檄念農覆
案之檢腦骨陷于顱非生前傷鉤距旁證得唆使人洪
永若方尙勳等而長德妻亦傷其夫尸之無故熏灼也
跪謝告實熊乃伏法事得雪 高宗南巡黃文襄尹文
端俱倚如左右手供張儲侍絲毫不挂於過差以才力
取遷擢其荅沈秋塘斷句云萬里長風一櫂孤中流帆
腳看巖嶇他時妒婦津邊過好向舟師細問途春色寧

遺貧女家錦翻新樣燦如霞嫁衣鍼線年年壓刺盡人間稱意花蓋有感於伎者之眾也三歲喪母十三歲有句云昨夜夢中呼小字相逢還問是何人其篤于天性若此

納蘭中丞常鈞由舉人授中書乾隆壬戌官甘肅安西道哈密西驛館壁間有題鴨子泉詩墨刻在焉詩云曾奏南薰解舜顏敦煌祠廟白雲間靈旗影裏銅烏靜社鼓聲中戰馬閒萬里平沙開瀚海一屏晴雪映天山高城月落飛羌笛又見春光度玉關關外平沙無極凌晨青黃一氣漫空撲地而來土人云此沙市也其序劉念

臺先生人譜云易繫詞言立人之道曰仁與義配天地
稱爲三才禮經言人者天地之心陰陽之端四時之會
五行之秀氣也故人而能盡人道則天地資以參贊萬
物賴以裁成失其道則與萬物等甚且或不如之莊周
言名者實之賓人之爲人卽名而實具焉被此名者不
可不重自審也與鐵梅翁刻人帖欲學者以人爲帖不
以書爲帖之言皆學者所當膺服

上虞趙赤繡教授金簡宰通許三年改官武林凡十八
年乃罷有玉簪花絕句云天將白玉結芳心鶴夢清芬
蟋蟀吟草逕風淒髮種種不應尙有未抽簪

泰州宮節溪廣文增祐束戴孝廉震云耆舊江夫子疑

義相與析

諱永字慎修發原人

方姜萬已往

方苞姜兆錫萬斯大三先生

鍾丈

酣經籍

諱晚著有春秋詩經周禮諸說

錢盧今鉅子

錢大昕盧文弼兩太史

王任

頗抉擇

王楷曾庶常任大樞禮曹任基振中書

云云勵暇先生書今不傳

然當時學人皆推重之節溪為定山中丞曾孫游方朴

山雷翠庭王已山陳桂洲諸公之門舉乾隆癸酉賢書

卒年九十三所居春雨草堂有香草亭美人之居為中

丞高臥著書之地節溪繪有蒹葭秋水圖子麟困菴嘗

館王述菴施小鐵兩公所亦工詩有硯耘吟稿

乾隆丙寅六月梓州琴泉寺淨屠圮內出藏經數十卷

浦江鄭琰西崖宰蓬溪得其法華殘葉同出刻經署尾
有朱書武成三年字遂推爲蜀王鐔鱸祥手書塔名下
光字上字微蝕類淨字同時題詠有宋銑小巖及錢坤

一有兩舉
制科印

王夢樓蔣清容趙損之吳白華程魚門盛秦

川錢竹汀錢竹初最後跋者練廷璜栗仁韓小亭玉雨
堂亦藏有此經劉燕庭謂在蜀未久物色未獲咸豐元
年劉寬夫以小亭所贈分惠十行意甚重之魚門詩云
熊熊潭醜光浮紙幾葉名經樹靈軌誰爲小楷王鱸祥
僞蜀相終唐刺史書工八法類仙手佛繫一家稱弟子
牙籤著錄二千卷紫閣迴翔三十祀穀膳應分當面廚

校讐待續崇文甌白藤擔子筆氣適青城山厓鼓聲死
修降表但罪李家草創寧知自公始寫經誓上般若船
藏匿教歸貝塔陟風輪缺破到琴泉長共松柴栗薪毀
潼川令君絕好事急走如鷹搜寶度依稀跋尾紅硃鈐
武成三年戊辰是是時帝者餅師兒兔子金床讖初紀
辟支牙獻賞僧腴半面妝成窺女美婆羅花作雪絮飛
薺蔔香隨絳雲起角冠纔禮玉宸迴珠帽俄驚灌口似
興亡瑣瑣托仙釋進退容容萃卿士冷淘飢飢紛何樂
銜璧牽羊吁可恥入草人終保暮年得無象教慈堪恃
此經法數七卷完此木叢殘一卷止厥惟釋序品居首

勛造莊嚴結歡喜第四卷復歸虞山

顧主事備九得信解品卷第四各

據奇琛裝錦綺牡金粟綻石函邊女珊瑚攀鐵網裏奔

荼迦利梵語謂白蓮花殊相呈阿耨多羅妙音委直將大地喻

根跏照破山河千萬蕊面上豐宜免狹長舌端腴漸舒

華薦諸說騰瀾果是非古姿觸眼煩銓擬君不見能仁

院弄宗壽札本業碑誇德筠記須臾變滅隨雲煙獨遣

書淫留俶詭金壺記以錯為書淫行間體勢特嚴謹柳骨顏筋抉

其髓雖無楚雲刺血虔已會毘邪握拳旨江瑤寸柱敵

諸味天酒盈囊瀝甘灑貪奇玩物信可箴說理談宗未

容訾詮題與證文字因雁掠寒空影沈水餘詩不具錄

朱笠亭題畹亭遺稿云翠羽明璫暫遊戲銷除有計去
春風吟魂應向吳江畔化作長天一斷虹幾行疏柳仍
殘照不盡涼雲散遠坳潘令獨愁秋色裏蕭蕭一雁下
寒汀畹亭爲錢弁江明經室沈蕙玉震澤人有聊一軒
詩其自箴四首云天生蒸民有覺其性陰陽肇判舍元
達順琴瑟載詠蘋蘩攸司夙夜用敬猶懼或虧無曰深
閨莫余云覲淑慝在躬指視暗室維椒與蘭植於中田
我思君子淑慎塞淵先民有言言不出閭牝雞之晨厥
家用損節以應佩琴以和神詞苟或費寧默而存勿尙
爾舌寸心是弛旣悔而追不脛千里嗟嗟愚盲慎其德

音鸚鵡多言祇名文禽絃纒在室煥乎有爛淒其以風
滋我永歎維織與紐爲坊厥心舍業而嬉淫慝相尋野
有絡緯振迅其翼爾安用媮微羽所疾雖有孔翠不如
春蠶之子纂組不如布縑冀妻如賓孟光舉案夫豈矯
情媮情斯遠啼眉折腰邦國之妖彼昏罔知反以用嬌
幽閒貞靜曰配君子載色載笑若佐之史敬而能和穆
如清風修身準此維以令終沈文憲謂可補班氏女誠
而深以年命不永爲惜也

王芥子贈邵荀慈句吾生得爾沾沾喜早歲論文憤憤
多芥子於文推服荀慈自言平生爲文未嘗苟作其荅

學徒諸篇具見宗旨所在尺書小簡四卷頗饒情韻類
魏晉人與羅泰初云從古人情不能免者聖人弗禁飲
食宴樂鐘鼓管絃之娛但使有節皆可以導鬱宣幽調
平血氣然初不聞許人恆舞酣歌沈沔於酒也後世人
物兩晉最爲無行飲酒弄婦人略不諱恥而自命放達
正是哀莫大於心死如劉伶以酒爲生此等人在世間
幹得甚事所謂相率出於無用胡爲不殺者也何名達
哉此語可以砭俗文集鮮傳本光緒壬辰鹿喬笙從伯
希得舊鈔本鈔板於京師芥子能填詞嘗語人云其樂
勝於吹竹彈絲居常自書青衫溼百字令諸闕以貽知

好此集無有非足本也

鄭誠齋贊善家本義門官翰林二十四年植品孤峻于
文襄官學士時以進呈詩冊屬爲改正謝曰前輩何敢
輕議乃別爲一篇以獻文襄斂手推服後文襄當國欲
要之一見屬陳銀臺孝泳數道意姑諾之終不往文襄
自是不能無槩於中乃欲以病辭職劉文正謂曰今會
典通考兩書未成乃舍我去我將焉倚強之留數月終
辭歸其提學湖南去任時有二截云輿前羅拜各陳詞
左設方圓右進卮苦道南方風俗陋野蔬村味獻宗師
遺珠不怨采珠人一例孤寒感激眞敢信鑑衡公論洽

須知耕讀士風凜短身而鬢眉秀異吐音洪亮馮魚山
其視學粵東所得士也爲定遺集少時常夢行萬山中
凌絕頂頂無雜樹多松松徑翼然而出者如亭然顏曰
吞松閣俯視斜日松陰滿亭洞庭周笠爲寫圖遂以名
其集論詩謂人之性情好尙不得強附在能自得師僕
于古人空際流轉處差有體會貫通耳與錢稼軒言作
詩須取古人神味如薰香然久自染化宗旨略同從兄
雪杖山人鄭炎字清渠爲客星山人陳古民女夫師友
多鉅人長德詩筆豪蕩屢試不入廢于酒人醉卽潦倒
任誕罵坐酣寢句如到夜不饒花底月逢時且過眼前

春花開自媚窗前月葉落方知天下秋所謂好襟懷初
不要人知者其祖名典字子詔父挺字不羣詩集附雪
杖集後以行猶山谷晦翁兩集之遺意也

鮑辛浦贈王載揚句云師資兼秀水宗派本新城蓋其
詩一以漁洋山人爲宗時時出入於小長蘆釣叟也阮
亭澣山雜詩云寺裏人看寶誌迴湖邊簫鼓晚仍開撐
船直入花深處雲葉當頭山雨來竹垞紅橋絕句春蕪
小雨滿城隈茆屋疏籬兩岸開行到紅橋轉深曲綠楊
如薺酒船來載揚亦有青谿絕句云青谿谿水碧于苔
高下河房繡幙開日暮藕花風起處魚鱗波上燕雙來

錢坤一己卯上元日圓明園正大光明殿待宴詩注

上御寶座王公大臣蒙古王貝勒貝子及于闐回長漠
咱吧爾等賜筵列殿東西楹間相對藉坐講官筵側侍
寶座右殿西北隅藉坐案圓明園經始於康熙辛卯正
大光明殿爲正衙，櫺爲 世宗御書上元後一日小宴
廷臣例設於此其乾清宮正大光明櫺額爲 世祖御
書景山觀德殿正大光明櫺爲 聖祖御書

香山距圓明園十餘里乾隆乙丑就行宮修葺爲園曰
靜宜率憩含暉堂披閱章奏引見庶官坤一靜宜園曉
直句云堯臺舜館藹朝陽遂谷修林擁太行西山爲太

行東榦香山其奇挺處也乾隆中香山閱兵歲無定數
嘉慶中歲幸香山二次一春避柳絮一重陽登高香山
寺建於金大定間來青軒爲明神宗所題園內外幢刹
交望鈴鐸梵唄之聲相聞近者臥佛法海宏教遠者華
嚴慈恩覺生最遠鐘最大卽永樂中鑄華嚴經其上者
坤一南苑曉直詩七十二橋三海子青蒼老樹舊衙門
南苑周一百六十里舊稱三海始於元時曰下馬飛放
泊瞭鷹臺卽元之仁虞苑行宮曰舊衙門新衙門皆明
時內監官署本朝因之爲行館其南宮則康熙壬辰所
建團河行宮乃乾隆庚子因疏濬鳳河所構團河出南

苑牆醜爲鳳河又東南流資滌永定河之濁由大清河
歸海乾隆間嘗命諸皇子習射獵于此汪韓門有南海
子請皇長子安及舊衙門侍皇子講讀詩成哲親王有
南苑雙柳賦

玉泉山靜明園聽政之所曰廓然大公山東麓爲裂帛
湖有雙栝爲金源時植元吳師道玉泉詩長松古檜見
未有卽此坤一詩擁佛山頭塔歸湖苑裏泉涼多文砌
坐靜極閣門宣塔卽所謂玉峰塔影浮圖九層仿金山
妙高峰爲之高踞重巒影入虛牖爲靜明園十六景之

周蘇綽定墨入朱出之制案牘施朱其來已久我朝家
法事無鉅細無不親覽內外衙門題本由內閣票擬簡
用人員則空名以待朱筆批出若遇緊急密之事則用摺
緘封直達御前批荅雖巡幸亦以爲常或手書千百言
或軍機大臣擬進硃筆添改 世宗硃批諭旨每摺批
荅累千百言錢蔣石祇領硃批諭旨一百十二冊恭紀
云特勅金函賜 先皇寶字瞻心心貫終始語語鏡洪
纖家法敷天舊官箴向日嚴重惟推至教于以輦勞謙
上下交旡咎天人際有常十三年紀握億萬世謨彰在
野傳如見趨朝拜是將紹衣申百職總爲兆民康 高

宗御製奉陵聖德神功碑告成感賦長句云謨烈昭垂
千百世憂勤想見十三年丹毫親御不憚煩勞自古所
未有也 高宗有詠硃硯詩

古者無火器漢書甘延壽傳注范蠡兵法飛石重十二
斤爲機發行二百步魏略云諸葛亮起衝車郝昭以繩
連石壓之車折唐書李密傳以機發石爲攻城具號將
軍礮皆用石發機至唐順之八編類纂載元時西域人
亦思馬善造礮世祖時從征襄陽置礮城東南隅重百
五十斤機發聲振天地宋呂文煥遂以城降世因目爲
襄陽礮此則用火礮之始左編云金人有火砲名震天

雷者用鐵確盛藥以火點之半里以上著鐵甲皆透又有飛火鎗注藥以火發之輒前燒十餘步可見自金元時始有鎗礮火器明永樂時平交阯得神機鎗礮法特置神機營肄習製用正德中西洋佛郎機國有海舶至廣東因傳其礮製嘉靖八年遂依造名之曰大將軍發諸邊鎮萬厯中大西洋船至復得巨礮曰紅夷今俗云紅衣重者至三千斤能震數十里國初天聰五年春正月壬午紅衣大將軍礮成鑄曰天佑助威大將軍天聰五年孟春吉旦造督造官總兵官額駙佟養性監造官游擊丁啟明備禦祝世蔭鑄匠王天相寶守位鐵匠劉

計平先是未備火器造礮自此始其年征明圍大凌河而功以成自後師行必攜之崇德間製神威大將軍重至三千八百斤康熙間製神威無敵大將軍重凡二三千斤不等又有紅衣礮重至五千斤武成永固大將軍礮重至七千斤錢坤一有天佑助威大將軍歌充續文獻通考纂修官時作也其火鎗之制則高宗有題花准神鎗舊准神鎗詩內府藏 聖祖所貽虎神鎗王申秋岳樂圍場用之曾殪一虎製詩文以誌其事 仁宗用準捷交鎗嘉慶壬戌刻詩於上康熙時內製烏鎗規制精絕每一發輒殲野禽三四內府所藏有御製自來

火鎗禽鎗大準鎗奇鎗神鎗準正神鎗純正神鎗連中鎗應手鎗威赫鎗威捷鎗各種交鎗線鎗之內如賽海青勝鴉鶻者名不勝書皆軍營狩獵所需以佐弓矢所不及若夫肄勤尙射親御威弧壹發參連殪禽服猛則固相承之家法也

高江村詩鳥嘴金鎗內製稀輕丸散處落雙飛周廬夜久重炊火賜出

圍中野鴨肥

佛經本出厄訥特克一譯而為唐古忒之番再譯而為震旦之漢蒙古經則康熙及乾隆年陸續譯成其以國書譯漢藏經則於乾隆三十七年開館譯定見 高宗太學石鼓詩序注石鼓第十鼓平面鑿為大孔自唐已

然圓徑一尺三寸深一尺二寸卽昌黎所謂曰科也科者坎坎者陷俗所謂曰窠昌黎語乃舉其實見乾隆庚戌再題石鼓詩注是年以周宣之文存不及半重用其文以成十章親定首章及末章自第二至第九命彭元瑞按文中餘字截長補短爲之是爲新刻石鼓與舊鼓並列國學其熱河文廟亦置一分焉

昌邑胡邦佑以蔭官盛京工部主事乾隆八年裁盛京各部漢缺補刑曹歷官寧波貴陽知府以事落職授永北同知三十二年征緬之役忠烈公明瑞檄辦糧餉賊擾木邦隨參贊珠魯訥拒守城陷死之李少鶴弔沒蕃

胡司馬贈公子璞云金沙達蝶連南溟瘴雲毒雨交沸
騰炎荒萬里行人絕蹉跎詎足勤天兵一夜風吹章臺
月詔書五道飛幽漠桓桓仗鉞明將軍年少登壇氣咆
勃誓將一劍掃朱垠免胄直入虎狼穴身經蜀相不到
處渡瀘南下更負絕桂陽司馬將門子提戈待罪前營
裏臨風上馬何灑然請纓破賊今老矣宛頂殺氣壓塵
堞死所未得今其可班超不圖生入關馬援已無尸可
裹盛朝信不乏人傑軍威暫卻非歸情我知公子豪且
賢贈君惟有獨漉篇國讐不塞冤未報會須一擊鵬搏

天

李子喬送劉公子灃通判撫州云河北兩觀察天下蘭
與劉屹立作龍門約束黃濁流維劉尤強項毅然不轉
頭大臣夙心重 聖主歎綢繆蘭名第錫山西吉州人
以永定河北岸同知擢知正定府乾隆己亥授永定河
道癸卯署河東河道總督三年真除勤于工務嘉慶丁
巳卒于官以操守廉潔免繳漫工賠項劉恪簡名寔單
縣人由知縣洊擢通永道至直隸總督十一任皆在畿
輔性質直不善交游不解奢麗嚴氣正性周知小民之
疾苦官宛平時盧溝橋尙氏旅店多陰戕過客沒其財
委曲發其姦西山煤礦多藏匿亡命偵緝散其黨兩以

伉直忤上官卒受主知敷歷三四十載入長兵部時崇
義有以掘冢竊葬官不受理叩闈者奉命往勘鞠知冢
在深山躬歷崎嶇實劾奏明察果斷時論稱之遷官
至兩淮運使

高宗論次臣工鑑衡不爽謂劉文正練達端方秉公持
正朝臣罕有其比故凡讞大獄督大工悉命往莅事無
不治者惟在陝甘時聞阿逆之變議棄巴里坤所見雖
謬然書生未嫻軍旅且遇事輒抒所見差勝於摸稜怯
避緘默自全者觀過知仁固宜深諒漢提鎮中宣力三
朝名震諸番者無出岳鍾琪右征噶爾丹策凌時議用

車戰因設車騎營肄習之終歸無用未免泥古之失耳
高斌存心忠厚且以理學自居人頗方正其辦河務實
能體國抒誠不涉虛僞乃其子高恆旣以任鹽政時受
商人賄伏法其孫高樸往駐葉爾羌貪黷藐法句通姦
商私賣私玉贓逾鉅萬且派累回人幾致激變因卽立
寘大辟雖憫高斌不能廢法曲貸任承恩獲罪念其父
舉前在金川陣亡兄承緒亦因救火傷斃父子皆歿於
王事承恩又尙無子嗣從寬不予句決乾隆乙酉 賜
湖廣總督吳達善詩注云俗有湖北督撫常不和之諺
或惑於形家之說以爲地勢使然此謬說也蓋公豈有

不和者於外省情僞燭照無遺如此

趙甌北輓外舅程文恭詩名歸青史無瑕指地過黃壚
有淚流文恭以己巳入直上齋戊寅民人潘濬控天津
鹽商牛兆泰欠引地價銀鹽道王愷伯之壻張曾效持
京札爲兆泰屬託文恭札中有承乏中樞晨夕內廷殊
多曠廢今秋未與木蘭之役稍得專心職業云云 高
宗謂尋常書札往來原與本案無涉但此語致無可致
之殷勤訴中情之充詘大約小翰林方進衙門以內廷
爲捷徑及積久滿志又以晨夕入直爲苦此韓愈所謂
丁寧婢子者也因解退書房俾專部務其後簡任綸扉

亦無可紀之績

張念耕廉訪學林爲文貞猶子有圖東詩如聞姪适凶
問等作縣至淒清可歌可泣其題懷清堂詩集後謂西
厓督學豫中六誓出清譽冠一時屢病垂絕欲乞身未
果使嶺南後風節與前異矣墨吏賈人子皆闌入題贈
宴會中是自呈其闕臺山乃先生之李漢編集時惜不
爲芟之史蕉飲先生使滇集與集中使黔草並駕一時
史後假旋淮南炊煙不繼謝富賈不與通念耕詩有云
早年游處勝流多風格高騫氣韻和一酌流泉空覺爽
廣州城下悔經過奉使滇南兩卷詩並時聲價孰差池

孤標晚歲淮南臥眼底何曾著估兒其言足與謝山相
證

圖東獨繭句云志難共喻詩都窘酒不成歡夢亦悲與
友人夜話云新事傳聞惟益睡舊游歷數各銜悲桑叟
甫序其詩謂攄露肫懇掇皮皆眞者也讀史雜詠云車
如流水馬游龍方略須知在及鋒卻笑漢家恩賞薄犁
庭功只博侯封知人信是安民本渴土誠爲相業先一
箇仲舒東閣外不知當世孰云賢朝衣東市事淒然峭
刻堪嗟漫道冤人面祇成今日果當時石竟不能言魏
其縱伏歐刀死庭辨猶銜漢主恩白馬未來西域教已

傳再厲有雙魂其有感於訥親伏法忠勇凱旋之事乎

汪師韓過故公園林云模榭聖壁空圖畫并乏裴炎座右銘

寧遠虞帝廟在九疑山舜源峰下有五臣峰南城陶
適齋金諧謁廟詩稽古重華帝南巡瀟水陰蒼梧雲馭
遠斑竹雨來深日月中天運風雷大麓心垂衣正南面
想像翠華臨尙泣龍髯墮虛傳馬鬣封中峰安寢廟東
序列笙鏞干羽陳新舞包茅貢舊供書生慙野服展拜
許從容玉笏朝羣后金芝走百靈雨中開晚翠天半落
空青波浪通湘水風煙接鼻亭土階崇儉德彷彿在虞
廷去去頻回首征衫一斗塵溪流岐子母山

山下有母山江子江

色辨君臣悠謬誇仙跡鴻荒問野人陳詞心未敢才謝
屈靈均詩極和雅其受知於金檜門有以也先祖於道
光中官寧遠先大夫讀書縣齋暇輒攬山水之勝少年
庭立耳熟能詳讀適齋入寧遠雜詩天半朱霞遠岫明
炊煙幾處亂雲橫疏林落日無飛鳥一路潺湲澗水聲
志載邑人李邵詩斷風疏晚竹流水切寒弦均可當聲
畫

陶適齋骨貌清癯性情冲澹以進士宰激浦江華二邑
者十四年有宦績舒伯魯記其逸事謂嘗拒大兵保劉
姓無反狀激人感之爲立生祠歸田後自以體弱早衰

不復出其題人瀟湘問渡圖云擲杖成龍萬里歸顛風
斷渡欲何之斜陽幾樹婆娑影又是江頭問渡時又記
同時人句如偶嘗雞肋何須戀穩臥牛衣未必非鼓柁
安流行自在不須借助一帆風寄語長年牢把柁開頭
只用半帆風恬退淵靜之懷隨處可見魯絜非爲銘誌
其藏稱爲循吏焉

于紫亭高雅淡靜辛卯以翰林改戶部辛丑遷御史次
年卒官傳凱亭善指頭畫紫亭頗得其法和太菴題其
水墨畫冊頗致推挹癸巳太菴使蜀過楊伯起祠有句
云不見銜魚來講幄祇聞鳴鳥落潼亭紫亭爲易一啼

字亦可謂一字師

甘泉吳舊浦精樞素治宿疾有奇效汪孟慈幼時痘後
虛熱不解舊浦以錢仲陽六味湯治之一日頓愈以丁
卯舉人官和州校官第一山懷古云南來迓客何多徧
北望傷懷得幾人謂南宋題名中惟張宗益憑高遠望
爲之慨然徐勵北望悵然飲不能醉余嶸劉燧極目遐
盼感歎興懷停杯而返餘皆安之至有謂我輩相從爲
一日適安用懷今昔而興歎如鄭釋之者亦論世之特
識也沈旣堂稱舊浦讀書精博嘗仿大事表著通鑑甲
子提綱曉度昭關句云最憐父子幾同盡不信君臣竟

可警義亦完足

平湖張龍威太學雲錦工長短句和厲樊榭天香賦辭
鏡云粉潔休磨塵輕不染識取夜來名字樊榭書其詞
後云蹤跡江湖燕尾船一回相見一流連新詞合付兜
娘唱可惜紅牙久寂然樂笑翁今不可回補題五闕屬
清才辭家鏡子塵昏後悽絕何人喚夜來詩曰蘭玉堂
築其南莊探梅句云人來淺水綠邊汶花問夕陽紅處
亭亦有致

陶篁村游王園句竹香圍鳥夢人影過潭心金司農尋
孟尊草堂云叩玉陰泉大如人雙樹長

歸安慎瑞揆上舍朝正居近菰城因號菰村居士家貧
訓蒙自給手編研露齋詩集丙杭堇浦作序堇浦稱其
發源栗里出入儲王著春秋闡義及毛詩原志趙東山
范逸齋不能過也讀春秋二首云客舍寂無事晨起檢
春秋三傳互牴牾百家盈紛糾注釋本凡例持論如刻
舟又如城巨書鍛鍊何其周遂使宣聖筆幾與申韓侔
哀哉困長夜一鐙不可求不知傳經者曾考其義不竊
取有遺旨昭如大路由倘欲求筆削試從孟氏謀何休
眞讒賊程積齋說杜預亦面友陳鐵山說傳信復傳疑無出范氏
右然此一家言師承祇墨守膏肓誰與鍼在唐稱趙叟

叔佐開奧窔伯冲從授受原父揚其波東山步其後辨
是析毫芒一洗千年垢立言領其要庶足垂不朽慎書
未見此詩可覘其說經大旨

吾鄉秦石公太守知全椒時明察善斷人不敢欺有黠
盜獲而復逸故爲小竊匿鄰獄石公適護鄰篆閱囚一
見卽曰此某盜也歸之獄乃定劉圃三送秦生廷堃出
當塗改調全椒云魚稻豐年瑞文章大國風濤聲五里
外山色半城中躡屨多名士傳衣望自公青檀君舊業
勿使歎途窮咫尺橫江路因風盼好音論文三歲字許
國十年心姑孰傳芳遠名公屬望深役車行部處爲汝

憩棠陰石公壬申鄉舉出圃三門下也

琉璃河橋邊倚鐵蓋蛟龍畏金防水者所作俗傳王彥章微時駕船篙安也趙鹿泉詩鑄金緣鎮水十丈倚河梁里俗未知古矜傳王鐵槍

守齋方伯伊轍布蒙古人由太僕寺左司郎中京察一等出知淮安府率屬廉惠濬渠一事爲淮人頌戴異聲大起累擢至福建布政使趙鹿泉爲題興文留蹟圖云興文古渠二牘連洪澤湖水交迴旋以時啟閉勤洩宣分溉淮陰萬井田何年淤廢成墊隘坐失水利遭水害誰與司牧但姑待視民疾苦若膜外仁明太守保障才

相時度地鳩百材力破羣噴招子來水工石工木工偕
濼鹵疆潦一以別塞者畢達污者潔引入泮池散平隰
如人血脈周身徹都無沈溺重腿憂但見月映清淮流
蠹蠹扛梁虹影修依依檉柳光風柔推許甚至在閩值
倉庫積虧爲督撫連歷被逮道卒諸子竝遣戍然以能
自刻厲家無私積不致如他人之遭橫焉此獄伍拉納浦霖錢受椿
均伏法高勒渾雅德均發遣州縣疑斬決者十七人長牧亭亦牽連謫戍

仁和顧涑園太守光乾隆戊午舉人由直隸令長游守
廣州在職廉潔以忤節使去官用詩古文倡導後生潘
德園懷人詩有寶玉鄉中貧太守香鐙座下老諸生之

旬至門牆士有諸王貴則早時嘗館朱邸也著橋頌堂
詩文集嘉慶戊午重赴鹿鳴曾宰清豐有惠政漳衛水
災盡心振務有勘災吟四首至是且五十年矣邑中父
老禮天竺大士至杭問太守里居無恙相率三十人登
堂羅拜而去湯黠山爲作清豐賢宰篇後二年卒年八
十四嘗作桃枝詞於柳枝橋枝之外自成馨逸亦前哲
所無也

邵叔山與兄齊烈弟齊煥並成進士爲翰林丙戌扶伯
兄靈樞南歸詩所謂師友不離天屬內恩光同侍日華
邊也其尊人恆山受學義門太史康熙庚子舉順天以

五策冠場癸卯下第 憲廟命大臣覆閱遺卷得賜進
士授南陽知縣時田敏肅治中州務深刻尤痛折科目
中人去者如落葉知志必不行之官七口引疾歸卒于
家沈于大爲作家傳叔少貌清古豐下銳上首微窪如
仰釜眉目疏秀短視每據案書若隱几臥者傳文忠金
川師旋坐朝房叔少立門外面之取鏡諦視文忠呼入
問曰若何視微哂不荅徑趨出其論古人有云於綺藻
豐縟之中存簡質清剛之制蓋自道所得也可爲學者
作文之法

梁蘂林相國舉雍正庚戌第三人張藻川少司馬娶相

國女弟後一科入詞垣乾隆丁巳召翰詹各員於乾清宮試論賦詩各一取一等第三人超授侍講躋卿貳癸未改官副憲卒於京師去文莊之薨僅三日陳星齋輓詩病中消息枕頻驚木稼占來雪滿城身是玉溪常制淚友非桑扈忍忘情燭殘沙路晨無燄烏哭霜臺夜有聲憶著六親彌引媿歲扶衰賤乞餘生里語六親同命太僕弟閩風爲侍郎姊壻也嵇文恭與文莊同登第又以女歸侍郎次子仲雅爲誌其墓袁存齋序露香書屋遺集謂雍正丁未偕先生同入泮宮其詩氣清才健有中唐風格仲雅詩才超雋比之潘子之後有尼夏侯之

學傳建云仲雅選學詩文集外有四寸學取荀子小人之學也入乎耳出乎口口耳之間則四寸爾語蓋讀書有所見條錄以備遺忘者也

夢堂閣老嘗爲翁閣學言官淮上時一日微雨棹小舟渡江訪某詩人今不記其姓氏矣其人適他出几上詠雨景一小闕填草未畢有句云溼了一庭落葉乾隆甲子元夕與盛青嶼張墨岑扁舟虎山橋訪徐孝先墨岑爲圖夢堂攜來京師辛未立春日墨岑北來重爲題記藏於檀欒草堂夢堂下世此畫爲兩峰道人所得閣學爲作夢墨歌云夢堂之夢墨岑墨如此兩人焉可得軒

然長嘯天地間
髣髴虛空見
顏色虛空誰
髣髴如此林
巒橫與側
林巒橫側
光動搖迷茫
詩思不可招
鄧尉花深煙
益益太湖
雲黯雨瀟
瀟邈邈尋
來光福塔
分明望到
虎山橋閣
老當時正
壯年吳下
詞客相周
旋一庭落
葉誰家句
十載扁舟
借榻緣徐
家今日留
昭法西磧
連晨訪孝
先孝先八
十今猶健
昨歲南昌
重對面每
說檀欒共
草堂兩峰
擗石追文
讌故紙摩
挲酒半酣
歸愚題字人
如見奇哉
此紙來對
論兩峰大
叫扣我門
哦詩果逢
沈碭士開
卷知是張
篁村三千里
外浮嵐涌
四十年前
舊酒痕兩
三酬唱寶
與主掩映
溪橋半煙
雨層

拚空明綠皺中伊軋昏陰數聲鶻不知香山空山偈何
如檀欒草堂語夢堂之夢彼卽此墨岑之墨應誰似冬
心老子詩畫禪及見兩峰稱弟子重攜此畫問家山呼
取精靈照江水家山江水淡煙螺不及墨餘空翠多兩
峰夜夜夢堂夢幅紙柰此篁村何遺訊吳門友竹叟和
我蘇齋夢墨歌閣學自謂在同年中年最少凡事請益
於諸兄抱經長於校讐揮石長於詩皆益友也與揮石
鄰巷論詩每清晨款戶者不問而知錢詩草來嘗謂揮
石勸我由平正入斷不可走欵仄路真至言也有句云
我師宮傅友侍郎嘗見其手評揮石齋詩極核

覃溪桂未谷思誤書圖詩注同年盧抱經學士精於攷索予輩小集談藝抱經仰而沈思以手頻摩其面同人戲語此省皁脂錢耳可謂善謔乾隆甲戌命翰林工楷書者梁國治秦大士梁同書莊培因等繕錄文選翁盧兩公暨朱文正戈芥舟校對於翰林院後堂東寶善亭內發宋板文選一部每冊有前賢手題墨蹟第一冊有御筆題云此書在天祿琳琅中亦不可多得覃溪與抱經記其中隨目所得校正之字歸而識於所讀本內是時抱經館於黃氏二人晨夕商榷諸本同異四庫館開以內府所藏書發出到院及各省所進民間藏書又

院中舊貯永樂大典內有摘抄成卷彙編成部之書分
員校勘潭溪每日清晨入署署設大廚供給桌飯午後
歸寓以是日所校閱某書應攷某處在寶善亭與程魚
門姚姬川任幼植諸人對案詳舉所知各開應攷證之
書目攜至瑠璃廠書肆訪查時江浙書賈亦皆踴躍遍
徵善本足資攷訂者悉聚於五柳居文粹堂諸坊舍每
日輒載滿車以歸四庫書成每部用香楠二片上下夾
之約以綢帶外用香楠匣貯之其上面皆用絹經用黃
經解用綠史用赤子用藍集用灰色其帙經以青史以
赤子以白集以墨總目以黃所約帶及匣上鐫書名悉

從其色焉凡三萬六千冊六千六百餘函每架四層每層十二函爲函四十有八書櫃四壁皆御題四庫全書詩覆校時派九卿科道翰林部郎百廿員每日大學士尙書各一員率領入校每卷黏黃紙小籤載詳校官姓名日給茶湯時頒紗葛各書刊補後選工書者五人填寫伊用侯詩呂公洞口片雲飛耶律墳前樹影微爲愛山空如太古紅泉響帶綠煙霏校書散直過昆明湖作也

江都李天垣約齋有鳴秋閣詠古樂府二卷五丈原云五丈原頭走木馬魏營欲戰無由假五丈原頭走木牛

魏將甘負巾幗羞五丈原頭將星落拂面秋風炎氣索
司馬按壘喜復哀天下自此無奇才卿無言云天寶矜
功兵屢耀覆師非直聞南詔丞相掩敗方頌功人不敢
言老闍告老闍告卿勿言卿勿言容朕思正是覓裳教
舞時安必不反朕保之步趨西涯有中郎虎賁之似
趙損之懷人詩東華輒土萬人海獨有錢郎愛著書貞
石吉金搜討盡不妨試手注蟲魚注謂辛楣太史近撰
爾雅述義今潛研堂無此目當未成書

韋慎旃歷數蕪湖風雅有蕭尺木雲從小曼雲倩韋羽
僊一鶴施河采天驊葛方夏舒英施次騏天驪王北疇

墅奚公石自潘孝瞻帖施淡吟長春擬輯爲鳩茲詩存
錢辛楣蔣漁邨曹習庵沈雲椒褚筠心吳白華褚鶴侶
吳二匏孫補山汪厚石陸耳山郭晴湖程蕺園趙璞函
嚴東有徐懸圃及慎旃皆以南巡召試特恩通籍九世
治易督學濟南於使院偕其子協夢協中學易於坳芥
亭因爲秋林講易圖丙申自權貴州巡撫重入翰林京
官鐫級例不得補翰林乃由外吏削職復入詞垣嗣以
祭酒鐫級復貳春坊仍兼館職皆殊數也其恩補右中
允恭紀云改官猶傍御河東思曼端慙正始風廿載五
來芝苑裏一身三到玉堂中未幾再領成均時年七十

矣又有炳燭課孫圖竹林研易圖

馮星實鴻臚著有蘇詩合注楊忠愍手植榆樹在刑部
獄中其敬題圖後四十韻甚工七盤嶺句云七盤路入
星河影一線江分隴蜀天

陳句山有評註蘇詩翁道蘆謂與諸家互有同異而論
特精確坡公出禱礮溪宿僧舍云深谷留風終夜響句
山謂寫景逼真自作鼓山宿白雲堂句云有夢柯俱古
無風籟未收卽用蘇句意也道蘆有長古詠之

海鹽吳鐙菴孝廉文暉爲侃叔尊人閉戶著書嘗效范
石湖四時田園雜興六十章敘述土風可補志乘又有

憫俗四篇錢竹汀謂爲香山諷諭之遺其博戲一首云
博戲古亦有迄今何紛綸稱名日以多制器日以新相
喚相呼曰徵逐野狐迷人無此酷一場縱博幾家貧後
車誰鑿前車覆長官豈不禁遣吏布教言上言國憲嚴
下言物力艱諄諄勸改轍宛若流涕宣朝來坐衙一何
怒捕得博徒兼博具屢教不悛罪難恕後堂照耀紅瓊
瑜退與賓客還呼盧

杭堇浦嶺南集送胡給諫定還朝云十年湖海別別久
愈情親訪俗青鞵遠匡時白髮新夢因埋照穩家爲著
書貧 聖主方前席難閒許國身謁 帝承明近毋忘

大小東貢船開獨蚤硯石采愁空米價增三倍鹽場備
五窮掖門丹筆在一一繪民風案給諫廣東保昌人雍
正十一年進士乾隆七年湖南巡撫許容誣參糧道謝
濟世踰閑蕩檢給諫時官御史劾容妒賢嫉能藩司張
璨附和朋謀傾陷情弊顯然當今聖明在上公道大彰
豈容有作好作惡罔上以行其私者乞敕詳查以儆官
常而杜偏黨命阿囊壯偕給諫往審秦鏡高懸山精盡
見督撫以下與其事者皆落職 高宗諭曰胡定身爲
言官若言事不實自有應得處分今研審旣得實情爲
謝濟世辨白冤抑其事尙小察出督撫挾私誣陷徇隱

扶同使人人知所儆戒此則有裨於政治爲益良多得
交部議敘焉同時倉觀察德遠眾直揭以救梅莊爲四
君子之一葦浦詩有云手開衡山雲綱紀肅僚案朋謀
扇陰邪特立不爲挽毅然發其姦直節見嶽鬼亦詠其
事也

那爾侍郎珠魯訥以乾隆乙亥繙譯舉人供職樞庭游
官禮侍丁亥八月從獵木蘭被旨赴緬甸軍營爲參贊
駐木邦賊瞰知城中水道已絕悉力攻圍時糧儲久絕
士卒無固守志亦無有爲請援者戊子正月於營內自
盡王述菴輓以詩云旃門獵罷奉軍符豈意旋捐六尺

軀慷慨何人能斷指蒼黃獨夜效銜鬢憑城雨礮干夫
指歸國雲旗萬騎趨誅蕩天門游帝所定持長彗掃蠻
區簪毫曾共倚瑤墀取義成仁是我師拜井心危揚水
後囊沙力盡唱籌時戮降尙苦邊臣議卹死終蒙 聖
主知太息歸元還未得空留宰樹護穹碑雲旗句謂殛
後有戍卒夜見公與明將軍入關騎從甚盛戮降句謂
公先時防樊夷反覆殺十餘人總督遂撫以爲罪也

高宗以其獨力不支情屬可憫賜祭葬入昭忠祠如例
聖祖嘗稱儀封張清恪爲天下清官第一子師載由舉
人承蔭累官河督謚愨敬曾孫裕穀出守南籠 高宗

諭令宜效先世居官爲人一生卽用不盡甫及二年卽拜温處監司之命有後食堂詩存多閒情風懷之作殊不類其家學哭從叔振儀句云福祿生前草文章歿後全差有理趣倪蛻翁致高文良書云蛻本吳民念昔江蘇賢使者向推睢州儀封二公睢州純粹平正化行而民不擾屬吏皆蒸蒸向風黽勉職任無至霜飛白簡者此睢州之治之大也儀封清介有節操與睢州同而隅執多疑翻異獄事不能輒了官吏或因此而行其諂諂者有之故二公俱係正人君子而其體用之間不無小異吳風涼薄易生是非故持節於茲者往往恃深機鉤

距以圖勝之遂至上下之情睽離不洽卽儀封亦稍存
此見不如睢州之擴然大公爲不可及也其言可謂知
政體矣

胡羨門郡丞蔚爲復齋中丞子以無錫籍充癸酉拔貢
需次河工棄去客滇西有吹萬樓集南詔野史訂正卒
葬昆明之商山乾隆初吾鄉顧用方侍郎撫吳招羨門
於小滄浪亭詩酒唱和時年二十有一其滇南望遠詩
云時名四十竟蹉跎慙愧明公獎借多記得小滄浪舊
事何曾自著虎皮鞞羨門名家子多識舊事嘗言康熙
中汪山樵供奉內廷後除醴泉令爲萬壽詩馳以獻

聖祖指謂諸臣何人冊子咸曰似陳邦彥書蓋山樵姊夫也 上笑曰此邦彥內弟醴泉令汪某也詩字俱佳其受知如此後失官落托後進易之山樵略不爲意羨門詩有云幾年著作直承明萬壽詩來御榻橫曾說九重親賞識是何年少笑韓翃檀默齋謂羨門之歿在壬寅五日歎其詞人薄命一飽無時早歲與巖桐峰給事李贄園太史爲文酒會所交如朱長梧趙飲谷翁霽堂多酬唱江南春諸作比諸揚州小杜失官落拓憔悴天南句如丹訣引年無上藥睡方消日抵長生近市依然身寂寞詣人終是足次且懷東山蠖齋澹園收夫壽泉

兄弟有云詩筒茗椀屋東西舊隱何時得其棲賸與春風知此意杜鵑紅處杜鵑嗥亦羈人之楚調也

劉虛白冠軍淳爲端勤公秉權曾孫蓉洲狀元饒都子
庚午武舉人工書畫與傅凱亭齊名秋感和恆益亭云
羝羊藩因方知觸孤雁弦虛己畏飛秋草云汗血正騰
宛騾裏荒邛誰展漢嬋娟語極悲壯其題自刻印譜有
云投簪近十年易糗逾四歲則又習篆刻也端勤以丁
未會推爲粵撫時年三十有四與尙藩共事者凡七年
推誠相與其爭銅鑪抑藩甲平南爲之折服康熙十三
年有奏請以尙可喜次子之孝承襲及搜捕賊首李唐

宗新設分巡道諸疏用兵潮揭與之孝敗賊鳳皇臺下
斬金漢臣俘偽將蘇忠等八十三人秉命不融未竟其
志而歿吳郡錢兆祉公受爲作傳極詳核顧丁璫湘佩
爲之跋亦客粵受知者也虛白題識謂大父侍御公及
狀元公皆享大耋文仲恭嘗受業於其裔孫榮第及甫
熟于掌故吾鄉籍漢軍者國初最盛卽劉氏一門疆臣
有名則宏遇清泰父子秉節則漢祚光美兄弟文學則
南泉魯南乾隆後進用日隘而人材亦衰

吳蠡濤丙戌下第戴匏菴禮部一見以從孫女歸之蠡
濤題其靜退齋詩集云皓首窮經滯一官向平初願幾

曾完趨庭跋涉聽銅鼓議禮蹉跎上竹竿老去文園憐
骨瘦貧來吏局歎裘寒遺編真歷恆河劫奉作靈光岿
嶸看雄名陡起碎琴餘韋杜流連薄笨車四海論詩求
大藥十年愛士遍春噓博昌身後寧無客丁令歸來未
有居都下搢紳齊雪涕片言知己最憐予又茗城水次
輓匏菴先生云再拜夕陽下西風灑淚頻博昌終有後
北海竟辭賓聖代談經叟儀曹臥病身徒留書萬卷不
救百年貧匏菴甲子京兆南元出董文恪之門延課其
子文恭丁丑始成進士子卽菴塘太僕居京師四十年
多識輦下故事撰有藤陰雜記其吳興詩話近人重爲

刊行自序謂同年友陳無軒廣文輯全浙詩話因與商
權多所訂正其謂鮑西岡詩法新城再任長興修太白
山人墓道腴堂集編止甲寅以後詩散佚蓋與蕞塘之
祖廉使最契也

秦西巖觀察丁丑授職八年之中三次典試四與分校
每召對 高宗必問曰汝揚州人有舊城新城汝住何
處奏曰臣住舊城 上曰舊城多是讀書人乞養後葺
老屋各署以額并系之詩舊城讀書處其一也

向例六年一選拔自乾隆丁卯改爲十二年秦西巖丁
酉送程貢士北上句云倍歲隆科目初春貢上雍

阮唐山天才亮特應機立斷少直樞密卽以推鞠割辯
案有聲及選西曹總讞事胸中裝牒訴尺許時有弟殺
兄牛而兄故殺弟者議者以爲弟是罪人兄爲尊長公
判曰弟殺兄牛本非盜賊兄刃弟頸實喪天良竟折罪
浙江捕盜船事有以內洋改外洋者大吏均擬絞公判
曰法嚴首惡律重誅心千總據實報聞其情輕都司代
改招詳其情重概擬絞不可且非稱與同罪律義千總
改擬流又有兄被殺而父受賂私利弟首其事證父以
賄擬徒公判曰爲兄洩憤手足之誼雖全陷父充徒恩
義所傷實重使依前擬不特父不能無憾於子子亦何

能一息自安應改子首如父自首例令其弟代父充徒
則無媿兄弟之義亦不賊父子之恩矣均如所議詩如
詠史云五世爲韓臣祖龍實韓仇良爲報韓出此義高
千秋韓王有遺孤瑣尾傷旄邛鄙生封六國韓祚其有
瘳漢主趣刻印行可光先猷歸而事其主豈不勝封留
咄哉借前箸良獨爲漢籌陳平多陰謀晚附諸呂力王
呂獨不爭何如王陵直超爲右丞相顯位以此弋太尉
誅諸呂平亦其狙擊詎知雁行驂不爲退飛鷁事成榮
名齊人孰窺其臂臣功不如勃方寸自披瀝亦有老吏
斷獄之概

百菊溪小兩無聲忽到鞍之句爲唐山所
賞遂與訂交菊溪爲刻其七錄齋詩選

國學辟雍創建於乾隆癸卯之春越甲辰冬而工竣乙巳二月上丁高宗釋奠於先師遂臨雍講學御製國學新建辟雍園水工成碑記阮唐山司寇時官通參擬唐臣楊巨源春日奉獻聖壽無疆詞十章廣六韻爲八韻以獻是年敷宣聖諭申明大學爲人君止於仁爲人臣止於敬爲人子止於孝爲人父止於慈與國人交止於信大易天行健君子以自強不息之旨嘉慶戊午仁宗舉行臨雍以大學之道在明明德在親民在止於至善君子以教思無窮咨保民無疆闡述經義洵盛典也

順德羅賁園秀才天俊有句云鐘聲流水際爲杭大宗
所稱巖月云石室生虛白夜寒疑雪侵忽看雲斂岫始
覺月窺林鶴夢冷潭影梅花清道心山僧偶出定聽我
一彈琴詩境極爲清峻大宗題其詩後兼簡賢兄孝廉
天尺云門初知從嬰暈來癭暈山房孝廉所居秋窗珍重一編開
眼前不少麒麟檀席帽青衫愛汝才大宗在嶺南與粵
人多所屬和兩過邛崑蘭雪堂詞人會者十五人何夢
瑤句琴聲遙送紅蘭榭詩夢重尋孔雀巢耿國藩句荷
珠乍瀉魚爭唼榴火新然鳥怪鳴陳華封句風定熟梅
時墮地雨深殘蘚半成泥馮公亮句藥院日高花弄影

沙床風定鶴梳毛高峻句萍檣矯立梳翎鶴莎徑喧迎
蠟屐人吳函句瘦竹翻翻蟲篆葉層欄浩浩鳥呼風皆
有可誦去粵之口以詩寵行者凡三百篇諸生方舟並
濟迫送河南者凡數百人其記櫂溪麥氏以昌華苑懷
古題開社得詩千首潘守戎憲勳獨冠一軍其潤筆則
東坡全集而以銀盃線紗薦茗昏筆副之大宗詩云月
泉枉自誇吟社忍笑清翁潤筆輕亦嶺外之雅談也

吳門王廷魁剛齡由諸生貢入成均所居曰盤溪少習
繪事以文衡山爲師顏其讀書處爲小停雲齋卽以名
其集畫贈惠定宇徵君云水北花南一徑通松風謾謾

響高空夕陽荷鍾來雲外知是山中采藥翁亦復娟秀
同里畫史有顧文錕蘆汀爲松交吏部五世孫詩曰雲
林小硯齋懷鄉口號云吾家舊宅絃歌里山水樓臺花
木多二十年來荒廢盡蕭條門巷可張羅妙嚴臺畔繁
花發秀野堂前襍樹深七十年前文讌會至今風雅播
詞林吏部所構雅園在史家巷舊名絃歌里秀野草堂
在閩邨坊巷也

董寄廬舊雨草堂詩私淑王朱其門人鄧汝勤謂讀雜
感四章棖觸欲淚嘗以集序屬覃溪覃溪持昔人書不
當有兩序之說爲別題二絕句於卷與舍弟閒話舊事

云古木神鷗漢壽祠英風颯颯動靈旗
巽年記與羣童戲跨虎驍騰學健兒
馬頰河干紅杏花春來卅里燦流霞
年年掃墓清明後策馬穿林問酒家
頗近放翁爲李西園題瑞鵲圖云
片塵不染雪衣輕飲啄隨緣逐隊行
敢向風前誇獨秀防他著眼太分明
豐草清泉得所依更無人處澹忘機
可知夜月江皋路大有驚禽繞樹飛
可謂言近旨遠

嘉興魏舒初爲僧名一壑住持桐鄉鳳鳴寺會鄉民有
與土豪爭田者縣令某已斷歸豪壑助鄉民使上控因
得直于是豪與令咸切齒於一壑誣治之爲榜于通衢

有能持壑私事者悉以告數日無所得將陰斃之于獄
適令以他事去舒雲亭至闕獄中得題壁詩一首歎曰
此湘繫遺音也立爲平反釋使返初服復姓更今名字
更生爲詩呈雲亭云纔解軍持別梵王臨歧心事半堪
傷冠巾重上先人冢衣鉢分傳弟子行舊剝風旛塵滿
座寒窗夜雨夢連床止一弟
早逝將身好比青蓮潔雖在汗
泥亦自香年來恩怨已忘情回首前塵涕尙橫羅織已
成三字獄齒牙翻借一時名青蠅黃犬吟徒苦落葉秋
風思更清不遇知音終見屈憐才千載獨吾生雲亭家
世通顯屏去紈綺之習歷宰浙東西四邑壹稟溫柔敦

厚以爲教所至頌其廉傳其詩卽更生一事洵仙吏之
逸軌藝林之佳話也施竹田贈更生詩有云掃除蔬筍
無兼味收斂冠巾又一時龐老尙留居士號東坡自署
罪人詩語極雅切

乾隆中西師奏捷朝廷行郊勞禮方恪敏總督畿輔築
郊勞臺張度西爲賦樂歌大書其上東坊曰六幕歸仁
西坊曰萬方送喜 純廟駐蹕新莊至行禮日由良鄉
縣穿城行度西爲居民賈戶作凱旋榜帖千餘幅一日
夕立就其過回子營四首云 聖德如天大游魂貸汝
曹一營安婦子八部隸弓刀疆布筠沖產朱提內府操

終須勤飲食不必憶葡萄寶帶麒麟服瑠弓錦繡鞍由
來馴象易差比沐猴冠務面吾安用丹心汝豈難藁街
昨夜望久已斬樓蘭巷過銅街轉樓高禁籞依風雷開
地闊日月近天威萬隊皆貔虎微生一蝨蟣花門留有
策始信杜陵非帳列仍回鴈郊閒但射雕能如金日磧
亦比霍嫖姚羊粟從安尉繩橋盡入朝兩階有千羽相
率聽簫韶極清壯之觀若良鄉道中觀西征陣亡將士
骨殖歸函二首則隱寓一將功成萬骨枯之意今並錄
之鬼雄無數羽林郎馬上西風戰骨香此日姓名標錦
纊當時談笑向沙場刀摧月竈秋雲紫鼓嘯天山落日

黃死入玉門恩未報哀歌誰肯唱伊涼國門咫尺列樽
壺少婦休升屋上呼罕帥生擒猶轉戰敵軍死赴在前
驅裹來馬骨心原快熏作沈香色未枯昨夜魂隨驃騎
出過河遮殺五單于

羊報者黃河報汎水卒也皋蘭城西有鐵索船橋橫互
河兩岸立鐵柱刻痕尺寸以測水河水高鐵痕一寸則
中州水高一丈例用羊報先傳警汎其法以大羊空其
腹密縫之浸以糝油令水不透選卒勇壯者縛羊背食
不飢丸腰繫水籤數十至河南境緣溜擲之流如飛瞬
息千里汎警時河卒操急舟於大溜俟之拾籤知水尺

可得豫備搶護至江南營弁以舟飛邀報卒登岸解其
縛人尙無恙賞白金五十兩酒食無算令乘車從容歸
三月始達張度西謂此卽元世祖革囊遺法作羊報行
以紀之吳韻皋視學至陝州楊夢蓮刺史兆李爲言州
民無蒔蔬者凡瓜蒘之屬皆產自平陸每晨平陸菜備
鼓羊皮渾脫亂流以濟韻皋詩君言賣菜備奮迅輕波
濤凌晨鼓渾脫永謝檝與篙蒙古有革囊遇水挾肘以
渡或謂之皮餛飩此亦其類也

宜興李積圃檢討英有蠡濤詩鈔其春明紀事詩云鐙
火天街爛似銀名銜遞送各逡巡伊波起促東西掖星

淡觚棱夜向晨

大朝于午門外遞職名辨色時鴻臚官促進東西兩掖門伊波者起行也

鞭聲徹肅朝儀臚序于官九叩時殿陛中和停曩擊門

階吹動鳳參差

上升太和殿擊靜鞭殿上奏中和樂太和門樂作乃贊引百官行九叩禮

廟社郊壇駕起行更籌急遞尙隴明龍樓鐘響鵷行靜

一道鐙光御輦平

上親祭出午門百官跪送以聞鐘為度時天未明御輦前導羊角鐙極

多五色雲旗次第回鼓聲樂節沸如雷羣依嘉量迎鑾

輅御御黃綾暖轎來

親祭將回儀仗先列樂鼓前導上乘轎不復御輦午門外有石臺

置嘉量迎送

臣跪依此界外邦朝序後臣工引領瞻天拜舞同箕子

遺封虔正朔寬襴阜帽古唐風

元旦百官行禮畢次及高麗國臣位在品級石

下其服飾猶

馴象蠻方職貢遙臣鄰引拜帝臨朝朝衫

霑溼分常俸共浥天家雨露饒緬甸國貢象來朝遇雨特給百官半俸瓊

扉闔處繚煙青旭旦垂衣敞五屏百職鳧趨臣鵠立清

班佩接玉階奠上御乾清門皆平明各衙門次第進本從東階上西則翰林科道各四人站

班階冊府清虛簡職司儲材親切姓名知上林特詔分

番覲第一銓卿入直時各衙門待直圓明園分九班以吏部為首是日輪編檢十員引

見金鋪玉城凜冰兢九五深宮最上層麁筆循牆髻儿

列羣瞻黼座赭黃綾乾清宮散館旁列壇墊漆几中即御座覆以黃綾君王顙

俊邇延英玉步從來蹕不驚誰近御前承顧問勅教稿

本許先呈上親臨試所諸臣各就坐處跪有近御者命呈稿本玉粒瓊酥出上

方同時稽首謝君王中官旅捧黃金盒沈李浮瓜冰泮

涼上賜試臣飲食後又賜鮮果月華西內禁垣深紫砌金泥祕殿臨

召對閣臣門外肅晨曦温樹碧沈沈養心殿在月華門內每大臣召對將

出即預備引見到理勤求戾不違曾瞻銀榜殿中廊雲松棟牖

尋常事一桁編萑日影長勤政殿係圓明園引見處夏日則庭架蘆棚蔽日金

鐘漏刻響丁東帝德光明正大中仰見壁璫分殿序宸

章無逸繪幽風嘗考正大光明殿殿有自鳴鐘東壁懸御書無逸篇西壁懸幽風圖係廷

臣張鵬萬國承歡王會陳參差膠葛御街新何來縹緲

仙人笛黃鶴飛來近紫宸辛未十一月恭祝慈寧萬壽內外臣工分辦自西直門

至內西華門內亭臺夾道百戲具陳天行按轡靜無譁

最宏麗者三座門外之黃鶴樓也雉扇微分對綺霞虎拜恭迎慈輦過斗樞羣拱倍光華

萬壽日 太后從圓明園回宮 上乘馬前 引覲賢良
導不設闕防羣臣跪道者咸得瞻仰慈顏

校射棚虎侯先植柳陰清黃羅移覆金階屺靜聽開弦

霽霽聲 上嘗御賢良門引見後與侍衛大臣校射別以黃蓋蔽日 龍荒萬里若郊

坳聖武常垂汗簡青載筆儒臣慙荷戟殊恩晉級踵

慈寧 皇太后萬壽京官各加一級嗣後平定伊犁亦然 聲金振玉闕櫺星夙駕

雍宮禮上丁瞻望山龍從跪拜虬枝翠接御碑亭 上親祭

成均齋宿雍和宮詞臣陪祭列碑亭旁古柏下 祀事圖橋上相臨質明登降必

齋心升香薦罍東西序分隸儒臣忝俸深 故事成均遣大臣祭則資

深編檢二員分獻四配 曉仗衝寒雪意催宸游尙食進瀛臺侍臣

擬表豐年瑞身到冰壺玉界來 嘗雪中引見瀛臺 西垣馳騎拂

朝暉奏事人傳幸討源靜直樓陰橫豹尾稻田流水似

江村討源書屋在祝嘏慈寧萬壽山別開行殿接朝班

玉瀾堂外昆明水金碧層層綠玉環萬壽山為祝嘏新創嘗引見玉瀾堂

前即昆明池詞臣供奉職非虛金匱書還金殿儲進御縹紉

千萬帙籤題黃絹殿中書武英殿藏書皆纂修臣書籤敦盤眞贗幾

紛更鑑古成書繪說精子母權衡籌國計更編錢譜入

西清御定西清古鑑書成命將歷代錢譜附後玉階行繞殿西廂校勘分司

浴德堂密室砥平規繭甕銘盤猶襲御香香殿上行走每集浴德

堂後有浴室規圓若甕而牖其頂傳為先皇齋戒處錦冊紛綸獻玉墀蓋青宣

德界烏絲盈廷恭紀編文穎突過元和聖德詩朝有慶典公卿

及兩院臣工各進恭紀詩冊今編載文穎龍旂虎節仰高臺青海逋逃繫頸

來聞說鐫碑番藏後受成重見鳳樓開西師奏捷御午門行獻俘上

禮聽鞠僉王眾棄之雷霆赫濯本無私羣卿兩院都承

旨摺片齊廣喜雨詩丙子四月會鞠堅磨集于都察院朝房旋命和詩呈用摺片一頁

鑲管程能簡石渠千秋編紀訂全書微臣曾與丹鉛業

齊捧冰紈拜玉除命內閣翰林院擇工書者錄紀事本末全書時職校對蒙賜紗葛餘

六首皆習見不具錄積圃為袁存齋甲子分校所得士

卒年七十二存齋為志其墓

雪橋詩話三集卷第六